



Anwar bersalaman dengan tetamu ketika menghadiri Majlis Gema Aidilfitri anjuran Dewan Perniagaan Melayu Malaysia (DPMM) di Pusat Dagangan Dunia, Kuala Lumpur, semalam. (Foto BERNAMA)

Jinping hadir bukan untuk menekan, tapi perkukuh hubungan'

Kunjungan Presiden China peluang baharu eratkan ikatan dengan Malaysia

Oleh Zanariah Abd Mutalib
zanariah_mutalib@bh.com.my

Kuala Lumpur: Kunjungan Presiden China, Xi Jinping ke Malaysia amat besar maknanya kepada Malaysia, terutama pada era yang mengasak ke arah kekacauan dan keberantakan ketika ini, kata Datuk Seri Anwar Ibrahim.

Justeru, Perdana Menteri merakamkan setinggi penghargaan kepada Jinping yang memasuki Malaysia dalam kunjungannya ke rantau ini.

"(Presiden) China tidak hadir untuk menekan tetapi untuk bertaut ikatan yang sedia terjalin kurun lamanya, selain meneroka ruang serta peluang baharu untuk memperkuatkan persahabatan.

"Di pihak Malaysia, kita akan

lakukan sedaya mungkin untuk menyemangati maksud dan iltizam ini atas nama keluarga besar Asia dan ASEAN demi kekuatan dan kestabilan rantau," katanya.

Jinping mengadakan lawatan negara ke Malaysia selama tiga hari, bermula Selasa lalu atas jemputan Yang di-Pertuan Agong, Sultan Ibrahim.

Beliau disambut dengan istiadat sambutan negara, diikuti kunjungan menghadap Sultan Ibrahim di Istana Negara pada Rabu.

Lawatan Jinping adalah sebahagian daripada siri lawatan negara pertama beliau pada tahun ini yang turut merangkumi Vietnam dan Kemboja.

Kali terakhir Presiden China itu mengadakan lawatan negara ke Malaysia adalah pada 2013, menyaksikan kedua-dua negara meningkatkan hubungan diplomatik kepada Perkongsi Strategik Komprehensif.

Pada pertemuan dua hala dengan Jinping Rabu lalu, Perdana Menteri menyifatkan hubungan akrab antara Malaysia dan China bukan sekadar rakan strategik yang komprehensif, tetapi sebagai sahabat sejati sama ada ke-

tika senang atau waktu menca-
bar.

Inisiatif China tawar harapan

Katanya, ketika sesetengah negara meninggalkan prinsip tanggungjawab bersama dan ada yang mempersoalkan komitmen yang sudah lama wujud, inisiatif global China menawarkan sinar harapan yang baharu, melihat ke luar dan tidak berbicara mengenai persaingan, sebaliknya pembaharuan.

Pada pertemuan itu, Malaysia dan China turut menandatangani 31 perjanjian persefahaman (MoU) dan kerjasama, merangkumi pelbagai bidang strategik demi kepentingan bersama.

Malaysia dan China menjalin hubungan diplomatik pada 31 Mei 1974, dan kedua-dua negara meraikan ulang tahun ke-50 hubungan diplomatik pada tahun lalu.

Selama 16 tahun berturut-turut sejak 2009, China kekal sebagai rakan dagangan terbesar Malaysia.

Jumlah dagangan antara kedua-dua negara bernilai RM484.12 bilion pada 2024, mewakili 16.8 peratus daripada jumlah keseluruhan dagangan global Malaysia (RM2.88 trilion).